



KEMENTERIAN PERTANIAN DAN KETERJAMINAN MAKANAN

Ministry of Agriculture and Food Security

Wisma Tani

No 28, Persiaran Perdana, Presint 4

Pusat Pentadbiran Kerajaan Persekutuan

62624 PUTRAJAYA,

MALAYSIA

No. Telefon : 03-8000 8000

No. Faks : 03-8888 6020

Laman Web : www.kpkm.gov.my

SIARAN MEDIA

MESYUARAT MENTERI PERTANIAN DAN KETERJAMINAN MAKANAN DENGAN EXCO-EXCO PERTANIAN BERSETUJU CADANGAN PENGGUBALAN ENAKMEN PENDAFTARAN PETANI

KUALA LUMPUR, 16 NOVEMBER 2023 – Cadangan untuk menggubal Enakmen Pendaftaran Petani telah dipersetujui dalam Mesyuarat Menteri Pertanian dengan Exco-Exco Pertanian Negeri Bilangan 1 Tahun 2023 yang diadakan secara hibrid pada 15 November 2023. Penggubalan Enakmen Pendaftaran Petani adalah bertujuan untuk menyediakan satu pangkalan data raya yang merekodkan dan mendaftarkan petani di Malaysia.

Melalui usaha ini, kerja-kerja untuk mengenalpasti bilangan sebenar petani yang terlibat dalam sektor pertanian dapat memudahkan Kerajaan menyalurkan bantuan dan insentif kepada petani. Selain itu ianya juga dapat dijadikan rujukan semua pihak khususnya dalam merancang pembangunan sektor agromakanan serta mengelakkan berlaku ketirisan dalam pemberian bantuan kepada petani.

Mesyuarat ini yang dipengerusikan YB Menteri Pertanian dan Keterjaminan Makanan turut dihadiri oleh YB Timbalan Menteri Pertanian dan Keterjaminan Makanan, Exco Pertanian daripada 13 Negeri, wakil Unit Perancang Ekonomi Negeri (UPEN), Pegawai Kanan Kementerian Pertanian dan Keterjaminan Makanan (KPKM) serta Ketua Jabatan dan Agensi KPBM.

Agenda mesyuarat kali ini merangkumi sebelas (11) pembentangan, iaitu dua (2) Kertas Pertimbangan dan sembilan (9) Kertas Makluman.

Antara kertas pertimbangan yang dibentangkan adalah mengenai Cadangan Pewujudan Kawasan Khusus Pertanian Organik di peringkat Negeri. Pewujudan kawasan yang dicadangkan ini selaras dengan Dasar Agromakanan Negara 2021-2030 (DAN2.0), Pelan Tindakan Dasar Sekuriti Makanan Negara (Pelan Tindakan DSMN) 2021-2025 serta Matlamat Pembangunan Mampan 2030 (SDGs), di mana pertanian organik adalah salah satu aktiviti yang diberi tumpuan dalam menangani cabaran global yang kritikal melalui amalan mesra alam serta keselamatan kepada pengguna.

Mesyuarat juga mengambil maklum berkenaan dengan Inisiatif Pengukuhan Data Sektor Pertanian dan Agromakanan yang memerlukan sokongan tadbir urus data daripada pihak Kerajaan Negeri untuk memastikan data pertanian yang terkini dan *reliable* merentas masa.

Selain itu, mesyuarat juga mengambil maklum akan Pelaksanaan Banci Pertanian 2024 oleh Jabatan Perangkaan Malaysia (DOSM) serta Cadangan Memperkuuh Industri Penternakan Ayam Untuk Keterjaminan Makanan Negara melalui Garis Panduan Perancangan Ladang Penternakan Ayam yang disediakan oleh Jabatan Perancangan Bandar dan Desa (PLANMalaysia).

Mesyuarat hari ini turut mengambil maklum akan situasi bekalan beras dan benih padi negara serta status pelaksanaan Jualan Agro Madani menjadi salah satu wadah yang sangat signifikan dalam mendokong hasrat kerajaan bagi menstruktur semula ekonomi dan menyediakan kehidupan yang berkualiti kepada rakyat. Selain itu juga, mesyuarat dimaklumkan berhubung keputusan Mesyuarat Jawatankuasa Kabinet Mengenai Dasar Sekuriti Makanan Negara berhubung Cadangan Hasrat Penubuhan Lembaga Perindustrian Nanas, Kelapa dan Durian yang dilihat dapat memperkuuhkan komoditi tersebut diperingkat global.

Mesyuarat turut mengambil maklum akan senarai Invasive Alien Species (IAS) di dalam Tanaman, Ternakan dan Haiwan Akuatik yang memberi impak negatif kepada sektor pertanian dan biodiversiti negara. Di samping itu, mesyuarat mengambil maklum akan cadangan KPBM untuk menambah baik Peraturan-Peraturan Perikanan (Larangan Cara Menangkap Ikan) 1980 dengan memasukkan Bubu naga atau bubu kamban (China Prawn Net Trap) sebagai tambahan peralatan menangkap ikan yang dilarang dalam senarai Jadual kerana telah menimbulkan konflik sosial dengan nelayan berlesen yang mengoperasikan peralatan pukat hanyut disebabkan oleh kerosakan yang berlaku terhadap pukat akibat tersangkut kepada bubu naga.

Kertas makluman berkenaan pelaksanaan Program Agropreneur Muda turut dibentangkan di dalam mesyuarat ini sebagai satu usaha KPBM untuk membantu dan menggalakkan penglibatan golongan muda dalam sektor agromakanan yang merangkumi kesemua bidang di sepanjang rantai nilai seperti tanaman, ternakan, perikanan dan industri asas tani termasuk pemasaran, latihan dan kursus teknikal, penyediaan perkhidmatan sokongan dan input pertanian.

Mesyuarat ini akan terus dijadikan platform sebagai salah satu usaha kolaboratif dengan Kerajaan Negeri yang dapat memperkasa sektor pertanian negara melalui peningkatan produktiviti, pengukuhan sistem sokongan dan perkhidmatan, pengurusan sumber secara mampan serta penggalakkan pelaburan dan penglibatan sektor swasta untuk meningkatkan sekuriti makanan, memacu pertumbuhan ekonomi dan meningkatkan kesejahteraan rakyat selari dengan DAN 2.0 dan Pelan Tindakan Dasar Sekuriti Makanan Negara.

KEMENTERIAN PERTANIAN DAN KETERJAMINAN MAKANAN
16 NOVEMBER 2023